



KENYATAAN MEDIA

KEMENTERIAN PERDAGANGAN DALAM NEGERI
DAN KOS SARA HIDUP

No. 13 Persiaran Perdana, Presint 2,
62623 Putrajaya

No. Telefon : 03-8882 5562

No. Fax : 03-8882 5569

PROGRAM PENGEDARAN BARANG PERLU, LPG DAN COMMUNITY DRUMMING

TENOM, 7 JANUARI 2024 – Hari ini saya telah mengadakan tinjauan pelaksanaan Program Pengedaran Barang Perlu, LPG dan *Community Drumming* (PoS to PoS) di sekitar daerah Tenom, Sabah.

Program ini melibatkan pemberian subsidi kerajaan melalui pelantikan syarikat-syarikat *transporter* yang memberikan perkhidmatan mengangkut barang-barang perlu dan kawalan yang terpilih daripada pusat/sumber bekalan (*point of source*) kepada pusat penjualan (*point of sale*) di kawasan pedalaman dan pulau.

Objektif program ini adalah untuk memastikan para penduduk di kawasan pedalaman terpilih mempunyai akses kepada sejumlah barangan perlu khususnya barangan kawalan pada harga yang sama yang dinikmati oleh para penduduk di kawasan lain. Pada masa yang sama, program ini juga dapat membantu mewujudkan kestabilan bekalan barang perlu dan kawalan di kawasan pedalaman.

Melalui program ini, kos pengangkutan barangan ke kawasan pedalaman terpilih dibiayai oleh kerajaan. Tujuh jenis barangan yang terlibat dalam program ini ialah beras putih, gula putih bertapis kasar, tepung gandum, minyak masak, gas petroleum cecair LPG (tong gas memasak), petrol RON95 dan diesel.

Bagi tahun 2024, Kerajaan Persekutuan telah menyediakan peruntukan berjumlah RM225 juta untuk pelaksanaan program ini yang melibatkan enam negeri iaitu Sabah, Sarawak, Kelantan, Terengganu, Pahang dan Kedah. Bagi negeri Sabah, sebanyak 654 *Point of Sale* (PoS) telah dikenal pasti bagi pelaksanaan tahun 2024 dengan anggaran peruntukan sebanyak RM79.7 juta.

Kementerian Perdagangan Dalam Negeri dan Kos Sara Hidup (KPDN) sedang dalam proses menambahbaik pelaksanaan program ini yang melibatkan tiga aspek iaitu;

1. Tatacara Perolehan

Pada peringkat awal pelaksanaan proses perolehan pelantikan syarikat *transporter* adalah melalui rundingan terus. Penambahbaikan tatacara perolehan melalui kaedah tender terbuka yang telah mula dirintis pada pertengahan tahun 2023 secara menyeluruh.

2. Mekanisme Kawalan dan Pematuhan

Kajian sedang dilaksanakan untuk menambahbaik mekanisme kawalan dan pematuhan sedia ada yang bergantung kepada pelaporan secara manual. Ini termasuk pengukuhan pelaporan bergambar dan mempertimbangkan pembangunan sistem khas dengan mengambil kira isu kebolehcapaian internet di kawasan pedalaman.

3. Penyasaran Komuniti Penerima

Menangani isu ketirisan dan memastikan sumber bekalan yang terhad dapat dinikmati oleh kumpulan sasaran. Ini termasuk mendapatkan penglibatan proaktif pentadbiran setempat untuk mencadangkan *point of sale* dan penerima manfaat di kalangan kumpulan sasar.

KPDN akan berusaha untuk menambahbaik pelaksanaan ini untuk memastikan objektif program dapat dicapai dan sekali gus membolehkan kumpulan sasar mendapat manfaat sejajar dengan dasar penyasaran subsidi di bawah Kerajaan Madani.

YB DATUK ARMIZAN BIN MOHD ALI

Menteri Perdagangan Dalam Negeri
dan Kos Sara Hidup